

## REGLUGERÐ

um breytingu á reglugerð nr. 118 9. september 1954,  
um sölu og veitingar áfengis.

### 1. gr.

8. gr. orðist svo:

Veitingastað skal heimilt að leggja allt að  $33\frac{1}{3}\%$  á kaupverð hans á áfengi, þegar neytendum er selt vín á hálfum eða heilum flöskum. Auk þess má veitingahús hækka verðið um allt að 43.75% frá þessu verði, þegar sala fer fram á minni skömmtum. Áfengis- og tóbaksverzlun ríkisins skal semja verðskrá yfir útsöluverð áfengis á veitingastað, sem gestir eiga aðgang að.

Á verðið eins og það hefur verið ákveðið samkvæmt framansögðu má einungis leggja söluskatt, svo og þjónustugjald, eftir þeim reglum, sem um þessi gjöld gilda.

Áfengisskammtur skal miðaður við 3 cl. Óheimilt skal að nota önnur mælitæki en þau, sem hlotið hafa löggildingu.

### 2. gr.

Reglugerð þessi, sem sett er samkvæmt áfengislögum nr. 82 2. júlí 1969, öðlast þegar gildi.

Jafnframt er úr gildi felld reglugerð nr. 282 31. október 1968 um breytingu á reglugerð nr. 118 9. september 1954, um sölu og veitingar áfengis.

*Dóms- og kirkjumálaráðuneytið, 30. desember 1971.*

**Ólafur Jóhannesson.**

*Ólafur W. Stefánsson.*

30. desember 1971.

Nr. 260.

**Staðfesting forsetans á skipulagsskrá fyrir Menningarsjóð Austur-Skaftfellinga, útgefin á venjulegan hátt að mandatum af dómsmálaráðherra 30. desember 1971.**

Skipulagsskráin er þannig:

## SKIPULAGSSKRÁ

**Meningarsjóðs Austur-Skaftfellinga.**

### 1. gr.

Kaupfélag Austur-Skaftafellinga stofnar sjóð, sem nefnist Menningarsjóður Austur-Skaftfellinga. Kaupfélagið leggur honum til stofnfé kr. 40 000.00 og svo árlegt fjárframlag eftir því, sem stjórn þess leggur til hvert sinn og aðalfundur samþykkir. Tekið verður á móti fjárframlögum annars staðar frá, ef einhver vill efla sjóðinn á þann hátt.

Þá skal Minningarsjóður látinna félagsmanna, sem er í vörzlu Kaupfélags Austur-Skaftfellinga, falla til Menningarsjóðsins og hann meðal annars annast hlutverk Minningarsjóðs.

**2. gr.**

Stjórn sjóðsins skal skipuð þrem mönnum. Formaður stjórnar skal kosinn á aðalfundi K.A.S.K., annar kosinn af sýslunefnd Austur-Skaftafellssýslu og þriðji af Menningarsambandi Austur-Skaftafellssýslu. Skulu þeir kosnir þannig að aðeins einn gangi úr ár hvert.

Endurskoðendur skulu vera tveir og einn til vara. Tilnefnir stjórn K.A.S.K. og sýslunefnd Austur-Skaftafellssýslu sinn hvorn endurskoðanda en Menningarsamband Austur-Skaftafellssýslu einn til vara.

**3. gr.**

Verkefni sjóðsins er að styðja að menningarmálum í héraðinu með fjárframlögum eftir ákvörðun sjóðsstjórnar.

**4. gr.**

Heimilt er að veita allt að  $\frac{2}{3}$  af árlegum tekjum sjóðsins hvert sinn sem fjárveiting fer fram. Þó getur fjárveiting orðið hærri, ef engin fjárveiting hefur farið fram næsta ár eða næstu ár á undan.

**5. gr.**

Komi til þess að sjóðurinn hætti að starfa, leggst fé hans í Varasjóð Kaupfélags Austur-Skaftafellinga, þó eftir nánari ákvörðun aðalfundar.

**6. gr.**

Skipulagsskrá þessari má breyta á aðalfundi Kaupfélags Austur-Skaftafellinga með samþykki  $\frac{2}{3}$  greiddra atkvæða.

Skipulagsskrá samþykkt þannig á aðalfundi Kaupfélags Austur-Skaftafellinga, hinn 29. maí 1971.

Óskar Helgason, fundarstjóri.

Skarphéðinn Pétursson, fundarritari.